

哈密志卷之五十一

回部志

回子郡王銜貝勒源流

欽定外藩蒙古回部王公表傳札薩克一等達爾漢額貝都拉列傳

今襲郡王品級多羅貝勒

額貝都拉哈密回部人初號達爾漢伯克隸準噶爾康熙三十二年遣理藩院員外郎馬迪等頒賚策妄阿喇布坦道哈密有叛賊罕都羅卜藏額琳沁者自準噶爾來降尋叛竄偕噶勒丹屬圖克齊哈什哈哈爾海達顏額爾克等以兵五百戕馬迪掠駝馬遁額貝都拉聞之給從迪者糧騎護歸嘉峪關上以罪在噶勒丹詔勿問哈密三十五年額貝都拉遣納林伯克貢駝馬表曰臣白帽族貢中國久天使至臣所噶勒丹以兵戕臣不能護脫恐不睦臣者謂臣與逆謀上卽天也違天者必受殃厄魯特數徙牧或肆掠已輒竄臣城郭居焉敢爲逆噶勒丹旣爲大軍所敗諭哈密勿藪逆額貝都拉遣使納林伯克奏偵噶勒丹至當擒獻上嘉其恭順賜章服貂冠金帶而是時噶勒丹遣圖克齊哈什哈達什哩鄂摩克圖哈什哈等貸糧哈密復齎書通問僧克拉什呼圖克曼殊呼圖克圖和碩齊台吉博貝等乞援族台吉

哈密志卷之五十一

回部志

一

禹貢學會
邊疆叢書

袞占妻諾觀達拉遣達爾漢宰桑挈屬從噶勒丹復令其乳母子丹津扎卜俄羅岱達爾扎及子色布騰巴勒珠爾乳母之父輝特和碩齊從色布騰巴勒珠爾獵巴里坤額貝都拉遣長子郭帕伯克以兵三百擒之明年遣次子白奇伯克械獻表曰臣擒噶勒丹子及其屬厄魯特必讐臣哈密危且懼請諭令勿虐臣詔策妄阿喇布坦及青海和碩特台吉等勿擾哈密賜額貝都拉及郭帕伯克章服銀幣白奇伯克如之從者給白金文綺有差時副都統阿南達設哨嘉峪關外額貝都拉告曰哈密地小而貧厄魯特竄至者衆力不獲養欲獻軍馬復多瘠請驅令出境阿南達語曰爾當體聖天子好生仁善養之軍事歲俟詔行而策妄阿喇布坦數遣使哈密索噶勒丹子檄以所收厄魯特歸吐魯番且詰哈密內附故額貝都拉語曰我誠附天朝非迫而然也策妄阿喇布坦憾之拘其使額貝都拉亟遣告曰策妄阿喇布坦將復索所收厄魯特不給將興戎詔已賜檄勿懼索者至勿擅給未幾噶勒丹自殺其族子丹濟拉攜噶勒丹骸走哈密掠畜遁濟木薩額貝都拉以告遣使往招降丹濟拉懼策妄阿喇布坦阻馳奔哈密額貝都拉迎入城給糧騎遣郭帕伯克護至詔以額貝都拉爲一等札薩克仍達爾漢號賜勅印及銀幣以郭帕伯克爲二等伯克協理旗務白奇伯克如郭帕伯克職四十八年卒子郭帕伯克襲

一次襲郭帕伯克額貝都拉長子康熙四十八年襲札薩克一等達爾漢五十年卒子額敏襲

二次襲額敏郭帕伯克長子康熙五十年襲札薩克一等達爾漢五十四年準噶爾襲哈密敗之大軍屯巴里坤額敏復墾塔勒納沁田歲輸青稞助雍正五年諭曰額敏自軍興以來輸忱效力率所部人等屯耕助軍甚屬可嘉著晉封鎮國公七年來朝晉封固山貝子優賚遣歸十年準噶爾兵復襲哈密額敏簡健卒設伏城外禦之馳乞援大軍至賊遁乾隆元年額敏奏興師來哈密歲納屯糧計二萬七千五百石已支用萬八千餘石今巴里坤軍撤請屯耕如故詔賜幣嗣免納糧五年卒子玉素卜降襲鎮國公

三次襲玉素卜額敏長子乾隆五年襲札薩克鎮國公十年晉封固山貝子十一年議設汎錫喇諾爾及畢柳大坂玉素卜請供官馬芻茭簡卒助守允之二十一年吐魯番莽噶里克叛子白和卓入覲旋抵哈密玉素卜偕副將祖雲龍議擒之達書吐魯番札薩克輔國公額敏和卓令決勦賊計獎勵幣復詔簡所部兵三百援吐魯番尋莽噶里克亂定二十三年春請以兵百從大軍征逆回布拉呢敦霍集占諭曰玉素卜係回部望族今聞辦理葉爾羌喀什噶爾等回部情願率兵效力深可嘉獎著照所請同雅爾哈善額敏和卓前往所有應得

分例照蒙古貝子例賞給回兵照綠旗兵丁例賞給果能奮勉勦賊朕將格外施恩詔授領隊大臣會靖逆將軍雅爾哈善奏俟取庫車烏什阿克蘇等城以從軍之庫車伯克鄂對等駐其地諭曰回人情性雖不同厄魯特而近年與厄魯特雜處不免漸染習氣未可深信取庫車等城後伯克鄂對等亦不當專令看守其聽玉素卜節制夏大軍圍庫車逆黨阿卜都克勒木自阿克蘇來援擊之敗遁頒賜御用佩飾霍集占尋攜賊五千餘援庫車復爲大軍所敗賜幣詔敘績秋七月賽哩木沙雅爾回人乞降玉素卜撫其衆攜徙軍營近地願留者以戶籍獻八月克庫車雅爾哈善令玉素卜駐其地阿克蘇降定邊將軍兆惠檄玉素卜駐阿克蘇尋烏什降復檄駐烏什大軍抵葉爾羌賊抗諸喀喇烏蘇時駐烏什兵僅二百五十餘玉素卜檄阿克蘇兵五百赴烏什防變復謀徵布魯特兵攻喀什噶爾分葉爾羌賊勢聞烏魯特特穆爾居烏什爲布魯特屬召給糧馬茶幣令侍衛布占泰攜往烏魯特等欣就道諭曰玉素卜辦理軍營駐守烏什俱能悉心奮勉甚屬可嘉著加恩賜給貝勒品級復以輸駝馬助阿克蘇援喀喇烏蘇兵詔如值給二十四年布拉呢敦霍集占竄巴達克山詔俟大功成簡玉素卜偕額敏和卓分守葉爾羌喀什噶爾資倚任復以報效志誠諭晉封多羅貝勒巴達克山尋獻霍集占首諭曰玉素卜雖不與將軍大臣等同在軍壘但駐劄烏什辦理

諸事亦極奮勉著加恩賞給郡王品級尋詔入覲伯克等四十四人以玉素卜偕貝勒霍集斯領之二十五年春至京召謁於正大光明殿賜章服行飲至禮於豐澤園賚銀幣復以烏什爲回部要地詔玉素卜弟阿卜都拉任烏什阿奇木伯克二十六年議塔勒納沁居屯田兵興版築玉素卜請助役不受工值獎賚幣及佩飾復諭優給口糧示恤冬十月諭曰前因額敏和卓玉素卜皆回部舊人若令伊等更替駐劄辦事於新疆有益去年玉素卜來京曾諭令在哈密休息年餘令額敏和卓當還吐魯番休息以玉素卜往代玉素卜著卽整裝候此次入覲回人等至哈密時卽同護送之乾清門侍衛等帶領前往著授參贊大臣應得公項照例支給伊子伊勒巴喇伊木看守游牧著加恩賞戴孔雀翎二十八年玉素卜就道額敏和卓以遣使巴達山索布拉呢敦尸及其孥仍留葉爾羌詔玉素卜暫理阿克蘇務冬巴達克山事竣玉素卜往代三十年烏什逆回賚哈木圖拉等糾衆叛副都統素誠偕阿卜都拉遣呢雅斯走阿克蘇告變素誠尋自殺詔伊犁將軍明瑞往勦會阿克蘇伊什幹伯克薩里弟額伊敏自烏什脫出告阿卜都拉遣屯田兵赴伊犁不給糧畜且科瘠羊四百徵回人銀被賊擒禁復納女賚哈木圖拉爲免死計阿克蘇辦事副都統弁塔海以聞諭曰阿卜都拉被回人拘禁朕尙以阿卜都拉係玉素卜之弟必不肯屈節今觀伊平日縱容所屬侵蝕回人銀兩又納女於賚哈木圖拉希圖臨難苟免此與叛逆何異豈可以其爲玉素卜之弟遂從寬貸著明瑞至烏什日務將此等情節查訊明確若果所傳不妄非獨逆回等當族誅示懲卽阿卜都拉亦宜明正典刑玉素卜奏臣弟阿卜都拉擾回衆致債事臣素失訓請議罪諭曰阿卜都拉以阿奇木伯克縱所屬人等滋擾激變罪由自取與玉素卜無涉著加恩免其議處時阿卜都拉被賊擒賚哈木圖拉奪其女將納之逆妻有怨言乃止因戕阿卜都拉復禁其女及子大軍既定烏什明瑞訊賊黨得情疏聞詔釋阿卜都拉孥歸哈密三十一年玉素卜遵旨自葉爾羌歸奏哈密生齒日繁請遣戶五百屯伊犁以次子伊薩克護往允之伊薩克自伊犁歸詔授二等台吉玉素卜尋攜長子伊勒巴喇伊木入覲中道皆疾卒以伊薩克襲

四次襲伊薩克玉素卜次子乾隆三十二年襲郡王品級札薩克多羅貝勒三十六年入覲賜三眼孔雀翎黃馬褂命乾清門行走三十八年詔授領隊大臣赴伊犁轄屯田回民四十四年諭歸哈密四十五年卒子額爾德錫爾襲

五次襲額爾德錫爾伊薩克長子乾隆四十五年襲郡王品級札薩克多羅貝勒五十三年諭曰哈密吐魯番二部皆國家世僕其餘各城回人雖經朕平定新疆時歸降但效力幾三

十年奮勉急公是以分別施恩賞給王貝勒貝子公台吉等封爵乾隆四十八年該院照例查明伊等封爵或定世襲罔替或定爲出缺後降等承襲雖係照例辦理但伊等來歸年久共感朕恩各勤職業卽如哈密郡王品級貝勒額爾德錫爾之始祖額貝都拉歸誠以來已歷數世額爾德錫爾之祖玉素卜在軍營勤勞懋著貝子鄂斯璠之父鄂對在軍營奮勉封授貝勒品級因罪削爵後鄂斯璠仍諸事抒誠效力復封貝子色提卜阿勒氏先在軍營奮勉又在阿奇木伯克任內數年留心辦事公伊勒巴喇伊木一等台吉鄂囉木咱卜二等台吉巴巴阿布勒丕爾敦三等台吉阿卜都呢咱爾帕爾薩伊等封爵或因軍前效力封授或因伊祖父功績賞給若照院議於出缺後降等承襲日久遞降殊非朕久遠撫恤回衆之意今施恩將議定降等承襲之額爾德錫爾色提卜阿勒氏鄂斯璠伊勒巴喇伊木鄂囉木咱卜巴巴阿布勒丕爾敦阿卜都呢咱爾帕爾薩等十人現襲之王貝子公台吉等封爵出缺時不必降等承襲俱著世襲罔替以示朕優恤回僕之至意併交該院行文各回城大臣將朕此旨通行曉諭衆回人等交相欣慶五十五年七月奉旨賜雙眼翎黃馬褂等因表傳所載又於嘉慶十八年額爾德錫爾卒子伯錫爾襲

六次襲伯錫爾係額爾德錫爾長子嘉慶十八年二月內襲郡王品級札薩克多羅貝勒道光十二年十二月內奉旨伯錫爾因十年軍需預備車駝甚屬可嘉着晉封郡王欽此由理藩院知照前來等因據此載入誌之回王福晉病故由理藩院行文蒙恩賜奠哈密廳備辦羊酒哈密大人派員前往致祭哈密廳造冊報部查銷

哈密回子郡王屬下

協辦回務伯克二員出缺咨報滿印房轉呈辦事大臣轉咨理藩院代奏咨覆到日准其更換頂戴

管旗固山章京一員若出缺咨報滿印房呈明辦事大臣轉咨理藩院

梅勒章京二員若出缺咨報滿印房呈明辦事大臣轉咨理藩院

扎蘭章京二員

佐領十三員

分得撥什庫十三員

頭等護衛五員

二等護衛三員

三等護衛四員

五品典儀一員

六品典儀一員

以上自札蘭章京至典儀均由回王自行揀放不報咨行

哈密五堡及各處回民入册者一千九百五十餘戶共男婦大小一萬二千六百餘口

哈密回子郡王銜貝勒每年進貢什物列後

磨刀石

葡萄

瓜干

回子布

青羊角

金銀鞘小刀

回子手巾

回子鞭子

哈密地處極邊匈奴舊屬唐內附易名伊州爲邊防重地士卒戍守每每苦之此樂府所以有伊州曲也元明之際叛服靡常清入中原始爲臣服置郡縣設官治焉惟以地處荒微文獻無徵志乘之書宿缺至道光二十四年鍾方爲哈密領隊大臣收羅案牘體驗人情流別山川考察風土分類編次爲哈密志五十一卷以未刊行故流傳絕少余昔曾自鈔本錄副近復借得精鈔本一種重加校勘邊疆叢書發刊乃以付梓亦謀所以信今而傳後云爾考鍾方字午亭漢軍正黃旗人道光二十二年以正紅旗副都統爲駐藏幫辦大臣二十六年改任哈密其駐藏時曾著有入藏須知番僧源流考駐藏程棧西竺輯錄小桃園記等書固洞明回藏情形者也丙子仲冬吳豐培跋於中海清華堂